

# KPT digesa turunkan yuran pengajian unversiti

Oleh [Saadiah Ismail](#) - Julai 9, 2021 @ 11:29am

[saadiah\\_ismail@bh.com.my](mailto:saadiah_ismail@bh.com.my)



Penurunan yuran pengajian universiti dengan cara mengecualikan beberapa yuran berkaitan selari dengan keadaan pandemik dan ekonomi ketika ini. - Foto hiasan

KUALA LUMPUR: Jawatankuasa Pendidikan Pakatan Harapan (JKPPH) menggesa Kementerian Pengajian Tinggi (KPT) menurunkan yuran universiti awam (UA) selaras dengan tuntutan mahasiswa yang belajar secara dalam talian saja.

Pengerusinya, Dr Maszlee Malik, berkata penurunan yuran dengan cara mengecualikan beberapa yuran berkaitan selari dengan keadaan pandemik dan ekonomi ketika ini.

Katanya, tetapi pada masa sama subsidi tambahan perlu diberikan kepada pihak universiti bagi menampung kos pengurusan universiti melalui geran khas dalam tempoh pandemik ini.

"Penyaluran lebih banyak geran untuk pembangunan infrastruktur dan infostruktur digital di semua 20 UA dapat memastikan kelancaran pembelajaran secara digital demi keselesaan serta kemudahan pembelajaran dan pengajaran.

"Tindakan ini akan membabitkan kepentingan lebih 500,000 pelajar institusi pendidikan tinggi awam (IPTA) di seluruh negara," katanya dalam satu kenyataan media, di sini, hari ini.

Katanya, bagi pihak institusi pendidikan tinggi swasta (IPTS) pula, kerajaan perlu mengimbangkan di antara kelangsungan pengurusan pihak IPTS yang terbabit dan juga kemaslahatan pelajar.

"Justeru cadangannya ialah kerajaan memberikan subsidi bayaran yuran kepada pelajar dari keluarga B40 dan M40 yang memungkinkan pihak IPTS membuat penurunan yuran ke atas mereka.

"Pengecualian cukai ke atas IPTS juga boleh dilakukan berdasarkan jumlah biasiswa yang diberikan kepada pelajar memerlukan dan berdasar penurunan yuran kepada pelajar tempatan," katanya.